

Dalekubłanje za kubłarki:

„Zažne rěčne kubłanje w pěstowarnjach na přikładze dyrdomdeja z jendželšćinu“

Někotre razy wob lěto poskićuje Rěčny centrum WITAJ dalekubłanja za kubłarki. Zašlu sobotu zetka so 14 zajimcow na zarjadowanje k temje „Zažne rěčne kubłanje w pěstowarnjach na přikładze dyrdomdeja z jendželšćinu“. K tomu bě sej rěčny centrum přeprošył pedagogowku Beate Tarrach, kotraž w pěstowarnjach Hornjeje Łužicy tydžensce jendželskorěčne projekty přewjeduje. Wobdžělnikam dalekubłanja předstaji koncepciju swjeho džěła, samowuwite materialije a najwšelakoriše ideje hrow k posrědkowanju cuzeje rěče džěcom w zažnej starobje. Přez prawidlowne nadžěłanje a wospjetowanje wokabulara, zaplečeneho do jednorych sadow, kotraž džěci w akciji a reakciji aktiwnje nałožuja, žněje Beate Tarrach trajne wuspěchi w swjim džěle. Je to mnóstwo jednorych zaběrow na zakładze mała srědkow, z kotrymiž zahoritosć a wćipnotu džěci za aktiwnje nałožowanje cuzeje rěče wubudža. Předstajene ideje wobdžělnicy na městnje zeskutkownichu a mějachu tak składnosć, so raz do situacije rěč wuknjacych džěci zanurić. W praksy wšak je potom jednore, tu jendželsce předstajene a dožiwjene ideje do serbsćiny přenjesć.

Byrnjež wjetšina přitomnych kubłarjow sama hižo lěta dolhe nazhonjenja z džěcimi w žłobikarskej, pěstowarskej a zakładnošulskej starobje měła, běchu wo wuwjedženjach referentki zahorjene. „Běchu to zajimawe a wotměnjawe zaběry, kiž su so nam tu předstajili“, praji Angela Langerowa, wučerka na wuměniku a tuchwilu wuwučowaca serbsćinu mjez druhim předšulskim džěcom w Budyšinje. „Tajke njejsu pola džěci ženje bjez wuspěcha. Tójšto mysličkow bě mi nowych, zdom pak běchu mi tež wobkrućenje mojeho dotalnego džěła. Wosobinska pilnosć a kreatiwnosć Beaty Tarrach je wobdziwajomna.“

J. Kaulfürstowa